

## Bernart de Ventadorn

### "Can vei la lauzeta"

Visit "[Can vei la lauzeta](#)" on [MotoLyrics.com](http://MotoLyrics.com)

Can vei la lauzeta mover  
De joi sas alas contral rai,  
Que s'oblid' e.s laissa chazer  
Per la doussor c'al cor li vai,  
Ai tan grans enveya m'en ve  
De cui qu'eu vey a jauzion,  
Meravilhas ai, car desse  
Lo cor de dezirer no.m fon.

Ai, las tan cuidava saber  
D'amor, e tan petit en sai,  
Car eu d'amar no.m posc tener  
Celeis don ja pro non aurai.  
Tout m'a mo cor, e tout m'a me,  
E se mezeis e tot lo mon!  
E can se.m tolc, no.m laisset re  
Mas dezirer e cor volon .

Anc non agui de me poder  
Ni no fui meus de l'or' en sai  
Que.m laisset en sos olhs vezer  
En un miralh que mout me plai.  
Miralhs, pus me mirei en te,  
M'an mort li sospir de preon,  
C'aissi.m perdei com perdet se  
Lo bels Narcisus en la fon.

De las domnas me dezesper!  
Ja mais en lor no.m fiarai!  
C'aissi com las solh chaptener,  
Enaissi las deschaptendrai.  
Pois vei c'una pro no m'en te  
Vas leis que.m destrui e.m cofon,  
Totas las dopt' e las mescre,  
Car be sai c'atretals se son.

D'aisso's fa be femna parer  
Ma domna, per qu'e.lh o retrai ,  
Car no vol so c'om deu voler,  
E so c'om li deveda, fai.  
Chazutz sui en mala merce,  
Et ai be faih co.l fols en pon!  
E no sai per que m'esdeve,  
Mas car trop puyei contra mon.

Merces es perduda, per ver,  
Et eu non o saubi anc mai,  
Car cilh qui plus en degr'aver,  
No.n a ges, et on la querrai  
A can mal sembla, qui la ve,  
Qued aquest chaitiu deziron  
Que ja ses leis non aura be,  
Laisse morir, que no l.aon

Pus ab midons no.m pot valer  
Precs ni merces ni.l dreihz qu'eu ai,  
Ni a leis no ven a plazer  
Qu'eu l'am, ja mais no.lh o dirai.  
Aissi.m part de leis e.m recre!  
Mort m'a, e per mort li respon ,  
E vau m'en, pus ilh no.m rete,  
Chaitius, en issilh, no sai on.

Tristans, ges no.n auresz de me,  
Qu'eu m'en vau, chaitius, no sai on.  
De cantar me gic e.m recre,  
E de joi e d'amor m'escon .

Submitter's comments:Â

Visit [Bernart de Ventadorn](#) page on MotoLyrics.com, to get more lyrics and videos.